

【考試個時節】

打早天盲光個時節，吾姆就喊佢摺吾哥、吾姊翫床，因為今晡日學校愛考試。佢煞煞翫起來，看等就會赴毋掣了。明明昨暗晡有認真讀到三更半夜，這下仰會頭暈腦疼，連東西南北都分毋清楚？管佢三七二十一，死馬做生馬醫，時到時當，無米正來煮番薯湯。

佢三步腳做兩步行，走到教室，看著同學盡早就來到學校，乜當認真在該看書。無幾久，上課個鐘仔聲響了，害佢著驚一下，心寒膽顫，當緊張。心臟差一息仔就會跳出來了。先生分好考試卷，先略略看一下，無想著逐條都係大問題。奇怪，昨暗晡個夜車坐到哪位去了？到這下還毋知好駛轉來，時間溜溜轉，鉛筆變鑊頭，先生看佢毋曉寫，目金金仔緊看佢，佢心肝肚緊想，毋過都寫無。

講乜奇怪，平常會寫個題目，這下全部都毋記得了，仰般寫都寫毋會鬥句，斡頭看其他個同學，有人當認真在該寫，有人頭那就會爪爛皮了，乜摺佢共樣寫毋出來。想著愛出門進前，吾姆還三叮嚀四囑咐，喊佢愛好好考試，毋好輸分隔壁個春美。